



Ein cyf/Our ref: HID/PO/0176/24

Paul Davies AS
Cadeirydd
Pwyllgor yr Economi, Masnach a Materion Gwledig
Senedd Cymru

SeneddEconomy@senedd.cymru

1 Gorffennaf 2024

Annwyl Paul,

Diolch am eich llythyr dyddiedig 18 Mehefin yn gofyn am wybodaeth bellach am
bysgodfeydd yn dilyn y sesiwn graffu weinidogol gyffredinol ar 13 Mehefin. Rwy'n hapus i
ateb pob un o'ch cwestiynau:

**Beth yw eich blaenoriaethau ar gyfer y sector pysgodfeydd a dyframaethu, a sut
fyddwch chi'n eu cyflawni?**

Rwy'n ymwybodol y bwriadodd y cyn Weinidog Materion Gwledig nodi dull strategol ar gyfer
pysgodfeydd a dyframaethu. Rwy'n deall bod hyn wedi'i gymeradwyo gan y Grŵp Cynghori
Gweinidogol ar gyfer Pysgodfeydd Cymru, ac edrychaf ymlaen at gyfarfod â'r aelodau maes
o law. Rwy'n bwriadu bwrw ymlaen â'r ymrwymiad a byddaf yn nodi datganiad yn yr hydref.

Yn y cyfamser, rwy'n disgwyl i'n cyfeiriad yn y dyfodol aros fel y nodwyd yn flaenorol, gyda
rheolaeth gynaliadwy yn ganolog iddo, a'n bod yn canolbwyntio ar gyflawni Cynlluniau
Rheoli Pysgodfeydd a mesurau rheoli addasadol. Bydd pob un wedi'i gefnogi gan wyddoniaeth
a thystiolaeth, a thrafodaethau gyda rhanddeiliaid.

Byddwn yn parhau i gyflawni yn unol â'n dyletswyddau statudol ac yn chwilio am gyfleoedd
a mentrau i gefnogi'r diwydiant i ddatblygu a thyfu. Bydd ein rowndiau ariannu drwy Gynllun
Morol a Physgodfeydd Cymru wedi'u cynllunio i fod yn sail i'r holl flaenoriaethau i helpu i
gyflawni'r canlyniadau yr ydym i gyd am eu gweld. Rwy'n falch o ddweud bod nifer
sylweddol o bobl wedi dangos diddordeb yn Rownd 4 y Cynllun ac rydym yn ystyried y
ceisiadau ar hyn o bryd.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Huw.Irranca-Davies@llyw.cymru
Correspondence.Huw.Irranca-Davies@gov.wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth Gymraeg sy'n dod i law yn Gymraeg ac ni fydd gohebu
yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding
in Welsh will not lead to a delay in responding.

A ydych yn rhagweld y bydd y 22 Cynllun Rheoli Pysgodfeydd ar y cyd y bwriedir eu cyhoeddi erbyn diwedd y flwyddyn yn cael eu cyflawni?

Mae fy swyddogion yn gweithio gyda'r Gweinyddiaethau Pysgodfeydd eraill, cyrff partner a rhanddeiliaid i ddatblygu Cynlluniau Rheoli drafft a fydd yn destun ymgynghoriad. Mae o hyd wedi bod yn rhaglen uchelgeisiol, a nodir yn y Cyd-ddatganiad Pysgodfeydd, yn bennaf am mai dim ond cam cyntaf y broses yw cyhoeddi'r Cynlluniau hyn ac mae angen gwaith ac adnoddau sylweddol i'w gweithredu.

Mae trafodaethau ar y gweill gyda'r Gweinyddiaethau Pysgodfeydd eraill ynglŷn â'r amserlenni cyhoeddi ar gyfer y 22 cynllun ar y cyd, ac mae'n anochel y bydd yr Etholiad Cyffredinol yn cael effaith. Fodd bynnag, gallaf eich sicrhau y bydd y gwaith o'u cyflwyno yn mynd rhagddo cyn gynted â phosibl a bod hyn yn parhau i fod yn flaenoriaeth ar draws pob Gweinyddiaeth.

Sut ydych chi'n sicrhau bod buddiannau Cymru yn cael eu cynrychioli yn y Cynlluniau Rheoli Pysgodfeydd terfynol, ac yn arbennig fod y cynlluniau'n sicrhau bod adnoddau naturiol yn cael eu rheoli'n gynaliadwy fel y nodir yn Neddf yr Amgylchedd (Cymru)?

Bydd y Cynlluniau Rheoli Pysgodfeydd yn ddull allweddol i ddarparu pysgodfeydd cynaliadwy a reolir yn dda, gan helpu i gyflawni ymrwymïadau polisi'r Cyd-ddatganiad Pysgodfeydd a'r Amcanion Pysgodfeydd. Mae ffocws allweddol ar reoli ein hadnoddau yn gynaliadwy, sy'n unol â gofynion Deddf yr Amgylchedd (Cymru). Bydd y Cynlluniau Rheoli Pysgodfeydd yn gosod cyfeiriad strategol ac yn darparu llwybr ar gyfer rheoli stociau allweddol gan gynnwys datblygu mesurau rheoli'r dyfodol a lliniaru effeithiau amgylcheddol.

Fel y nodais uchod, bydd pob Cynllun yn destun ymgynghoriad i sicrhau bod rhanddeiliaid Cymru yn cael cyfle i roi mewnbwn, a bod eu barn yn cael ei chynrychioli.

Yn ogystal, cyhoeddwyd Cynlluniau Rheoli Pysgodfeydd ar gyfer Draenogiaid Mor a Chregyn y Brenin ym mis Rhagfyr 2023 ac mae grwpiau cynghori rhanddeiliaid wedi'u sefydlu i gefnogi'r gwaith o weithredu'r cynlluniau yng Nghymru. Bydd Cynlluniau Rheoli hefyd ar gyfer cregyn moch, cocos, crancod a chimychiaid yng Nghymru yn ystod cyfnod y Cyd-ddatganiad Pysgodfeydd hwn. Disgwylir i'r Cynllun Rheoli ar gyfer Crancod a Chimychiaid gael ei gyhoeddi yn 2026. Gan weithio gyda sefydliadau partner, ym mis Ebrill cynhaliwyd nifer o gyfarfodydd cyn ymgynghori llwyddiannus ledled Cymru ym Mangor, Ceinewydd ac Aberdaugleddau. Mae disgwyl y bydd cyfarfodydd cyn ymgynghori pellach yn cael eu cynnal ar draws yr haf a fydd yn sicrhau bod buddiannau Cymru yn cael eu cynrychioli.

Unwaith eto, diolch am ysgrifennu ataf ar y pwnc pwysig hwn. Gobeithio y bydd yr wybodaeth hon o gymorth i'r Pwyllgor.

Yn gywir,



Huw Irranca-Davies AS/MS

Ysgrifennydd y Cabinet dros Newid Hinsawdd a Materion Gwledig
Cabinet Secretary for Climate Change & Rural Affairs